



Republika e Kosovës – Republika Kosova  
Paneli Zgjedhor për Ankesa dhe Parashtrësia  
Izborni Panel za Žalbe i Predstavke

ZL.Anr.286/2017

**Paneli Zgjedhor për Ankesa dhe Parashtrësia (PZAP)**, në panelin e përbërë nga gjyqtarët: Gyltene Sylejmani kryesues, Ymer Hoxha dhe Adnan Konushevci anëtar, me pjesëmarrjen e zyrtarit ligjor Ardian Maxhuni, duke vendosur përkitazi me ankesën e subjektit politik Lëvizja e Vetëvendosje (LVV), dega në Prishtinë, paraqitur kundër subjektit politik Partia Demokratike e Kosovës (PDK), dega në Malishevë, për shkak të thyerjes së Kodit të Mirësjelljes, për Zgjedhjet Lokale 2017, në seancën e panelit të mbajtur me 22.10.2017, mori këtë:

### V E N D I M

**Pranohet** si e bazuar ankesa e subjektit politik Lëvizja Vetëvendosje (LVV), dega në Prishtinë, ndërsa subjektit politik Partia Demokratike e Kosovës (PDK), dega në Malishevë, i shqiptohet dënimi më gjatë në vlerë prej 3500 euro (*tremij e pesëqind*), të cilën detyrohet ta paguaj në afat prej 15 (pesëmbëdhjetë) ditëve, nga dita e pranimit të këtij vendimi nën kërcënim të përmbarimit.

### A r s y e t i m

PZAP-i, ka pranuar një ankesë më datë 20.10.2017, nga subjekti politik LVV, me të cilën pretendon se aktivistët e tyre, kanë vërejtur se me datë 19.10.2017, në orën 14:15, në rrugën “Rilindja Kombëtare” nga qendra në Malishevë është vendosur një tavolin me material zgjedhor. Me këtë rast parashtruesi i ankesës thekson se subjekti politik PDK ka bërë shkelje të dispozitës së nenit 4.1 pika b) të Rregullës Zgjedhore të KQZ-së nr.11/2013, nenit 3.4 të Rregullës Zgjedhore nr.13/2014 të KQZ-së.

Në mbështetje të pretendimeve ankimore ka bashkangjitur një fotografi nga vendi ku ka ndodhur shkelja.

Në përgjigje në ankesë të datës 21.10.2017, subjekti politik PDK, thekson se aktiviteti i zhvilluar në vendin e supozuar të shkeljes nuk përmban elemente të shkeljes sepse tavolina e vendosur në qendër të Malishevës ka qenë lëvizëse dhe në të njëjtën ditë me datë 19.10.2017 Rinia Demokratike dega në Malishevë ka pasur një aktivitet promovues nga ora 14:00 dhe vendi ku është vendosur tavolina është para selisë së subjektit politik PDK, duke theksuar se me të përfunduar aktiviteti i subjektit në fjalë, të gjitha materialet zgjedhore bashkë me tavolinën lëvizëse janë larguar nga vendi. PZAP-it i ka kërkuar që ankesën e ankuesit ta refuzoj si të pa bazuar.

Paneli, pasi që shqyrtoj dhe vlerësoj shkresat e lëndës, konform dispozitës së nenit 117 paragrafi 2 i LZP-së, konstatoj se:

## Ankesa është e bazuar

Paneli nga fotografia e ofruar si provë nga parashtruesi i ankesës, e cila gjendet në shkresat e lëndës, në mënyrë të padyshimtë, ka vërtetuar se në rrugën publike “Rilindja Kombëtare” nga qendra në Malishevë është vendosur një tavolin me material zgjedhor nga subjekti politik PDK me qëllim të promovimit të fushatës zgjedhore, veprime këto që janë në kundërshtim me nenin 33 pika b) të LZP-së e cila përcakton: *“Gjatë periudhës së fushatës, subjekti politik, mbështetësit ose kandidatët e tij, ndalohen vendosjen e njoftimeve, pllakave dhe posterave ose përndryshe vendosja e emrave të tyre ose e sloganeve në lidhje me fushatën zgjedhore brenda ose jashtë hapësirave ose ndërtesave të zëna ose, ndryshe, që shfrytëzohen nga organizatat ndërkombtare, ose brenda ose në hapësira private pa lejen e pronarëve ose shfrytëzuesve.*

Nga arsyet e theksuara më lartë, ankesa e parashtruar nga subjekti politik Lëvizja Vetëvendosje (LVV), u miratua si e bazuar pasi që pretendimet në ankesë janë të bazuara në fakte bindëse ku vërtetohet se subjekti politik PDK, ka bërë shkeljen e Kodit të Mirësjelljes. Paneli, vendimin e tij e mbështeti në dëshmi të qarta dhe bindëse siç përcaktohet me nenin 117 par. 3 të LZP-së, prandaj pretendimet në përgjigje në ankesë nuk u cilësuan me ndikim në meritat e lëndës.

Parashtrimet në përgjigje në ankesë, se veprimet e subjekti politik PDK-së, nuk mundë të sanksionohen si shkelje e Kodit të Mirësjelljes, paneli i vlerësoj si të pa bazuara dhe si të tilla i refuzoj pasi që pretendimet e tilla nuk i justifikon veprimet që janë të ndaluara dhe në kundërshtim me dispozitat ligjore të Nenit 33 pika b) i LZP-së, si dhe neni 5 paragrafi 1 pika d) e Rregullës Zgjedhore nr. 13/2013 të KQZ-së, ku parashihet se subjektet e certifikuar politike aktivitetet e tyre zgjedhore duhet t'i bëjnë ne pajtueshmëri me Rregullat zgjedhore të Komisionit Qendror Zgjedhor (KQZ), Kodin e Mirësjelljes, të nxjerrur nga Komisioni i Pavarur i Mediave dhe ndonjë legjislacion tjetër në fuqi. Ky përfundim ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokratike, paqes dhe respektit për sundimin e ligjit.

Paneli me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat për rastet: natyrën e shkeljes dhe ndikimit të mundshëm të saj në procesin zgjedhor në fjalët, shkallën dhe peshën e shkeljes, pjesëmarrjen e subjekti politik në zgjedhjet e mëparshme që konsiston në faktin se PDK-ja, ka qenë e njoftuar me obligimet dhe përgjegjësit gjatë procesit të fushatës, shkeljet e ligjeve zgjedhore në fuqi që ka bërë subjekti në fjalë në këto zgjedhje dhe në zgjedhjet e mëparshme në Kosovë që do të thotë se i njëjti është i njoftuar me rregullat zgjedhore si dhe shumën e fondeve që ka marra subjekti politik prej Buxhetit të Republikës së Kosovës, për zhvillimin e aktiviteteve lidhur me fushatën zgjedhore. Po ashtu si rrethanë, PZAP-i, mori edhe faktin që këtij subjekti, ia dha mundësinë për tu përgjigjur ashtu që në përgjigjet e tij ka mohuar shkeljet e supozuara. Mos ndërmarrja e masave përmirësuese ka ndikuar negativ në lartësinë e gjobës së shqiptuar si në dispozitiv të këtij vendimi. Paneli po ashtu vlerësoi se dënimi i shqiptuar ndaj subjektit në fjalë do të ndikon që mos të përsëriten veprimet e kësaj natyre në të ardhmen.

Paneli në kuptim të nenit 120.1, pika c), dhe nenit 118.1, të LZP-së, vendosi si në dispozitiv të këtij vendimi.

**Paneli Zgjedhor për Ankesa dhe Parashtrësia**

Zl.Anr. 286/2017 më datën 22.10.2017.



***Këshilla Juridike:*** Kundër këtij vendimi nuk lejohet ankesa konform nenit 118 par. 4 të LZP-së.